



嘉永庚戌孟春

湖山櫻詩箋

遊焉吟社藏板



湖山樓詩鈔序

橫山舒公淡海人。東學於江戶。又以其所得授後進。以資衣食。苟有餘裕。則必千里賚歸。以為北堂之獻。若是者數矣。余恒嘉其所為。以為厚於人子之情者也。今將刻其詩。屬序於余。余乃謂。詩之本於情也久矣。其為人也厚於情。則雖有不工於詩者寡矣。其為人也薄於情。則雖有工於詩者寡矣。若夫世之輕俊子弟。東西薄遊。吟弄風月。耽嗜名利。於家鄉倚門之望。漠然不存。諸懷而徒求工於體物。於措辭。以趨一時之風尚。工則工矣。而詩之真亡矣。謂之不工可也。且夫歷游乎通邑大都。

跋沙乎名山巨川。或遭遇間關。感慨所繫。發泄乎翰墨。以窮其變化。名當時而傳後世者。固千載以來騷人韻士之所同也。今東海東山二道。則多山川名區。古昔英雄戰爭割據之墟。而舒公歸省之日。路必由於二道間。感慨之餘。出之以厚之情。故其詩真摯而多變態矣。其歡欣怡懌。芊綿流麗者。歌頌升平。戀賞光景也。其蒼涼沈鬱。幽峭深長者。感憤遭遇。憂念世事也。而憑吊古蹟。則有徬徨淒惻之慨。登攬勝區。則多超曠邁往之懷。至若雕績以為艷。刻畫以為巧。則雖非所長。其能拔出乎時流。自成一家者。蓋為是故也。抑余二親見背既舊。風木之感。徒切中腸。而少也縻塵累。老未能歷涉山川名區。以開拓耳目。才力歲就。亂散詞華。日以凋謝。讀舒公之詩。感愴慙愧。并至焉。而於其屬序。不敢辭者。以志吾感與愧也。

嘉永二年己酉冬十二月望

和庵居士藤森大雅撰



湖山樓詩鈔卷之一

淡海 橫山卷 舒公

梅花喜鵲圖

紅映梅梢晴旭開。熙熙此處即春臺。山禽向我語言好。今日遠人誰定來。

讀陶詩

琴書平日樂天真。數卷新詩萬古春。亂世不為哀怨語。陶公此段是高人。

題舊作梅花詩後

逋仙麗句冠千古。太史新篇別一家。愧被春風笑顏厚。

醉吟我漫賦梅花

病起春日雜題八首示大沼枕山生方鼎齋竹內

雲濤三子錄四

一雨花將綻。連朝病未除。要聞風景美。其奈友朋疎。城  
市寄萍跡。蕭閑同佛廬。倦來時煮茗。悶極或臨書。  
俯仰感偏多。鉤簾觀物華。人閒晝逾永。風細雨仍斜。黃  
鳥旗亭酒。清琴水閣花。平生行樂意。一併付長嗟。  
寂寞了芳時。何由慰我思。奔趨真可厭。命運敢相疑。病  
起甘幽獨。貧來絕宴嬉。偶然故人至。袖出看花詩。  
嘆息復嘆息。吾生終奈何。野芳多艷態。春鳥互嬌歌。耆

舊凋零甚。輩流輕俊多。回頭思故國。茅屋鎖烟蘿。

蛺蝶詞倣陸放翁

輕陰不散。遲夕陽滿地。吹薰花草香。九十韶華誰不樂。  
就中狂蝶最能狂。競艷紫房與紅萼。依風粉翅無住著。  
美人魂夢春一場。任他詞客嘲輕薄。花朝過後寒食前。  
紅壓宮禁色更新。勸君宮禁且休近。綵紈猶有撲蝶人。  
題瓶中牡丹

一朶嬌紅滿意春。膽瓶插得最精神。不嫌寒素來相伴。  
究竟貴花勝貴人。

鎌倉雜感十二首

雲濤萬里望悠悠。棖觸人間何限愁。帝位空高天北極。  
世風漸下水東流。金湯海內無雙固。兵馬關中第一州。  
今日與誰論往事。殘陽獨上野僧樓。

巍然廟宇俯滄湄。說是康平創建之。鼓角東征策勲日。  
衣冠王室式微時。百年妖霧弥天暗。千里腥風掠地吹。  
至竟興亾人自取。神靈萬古本無私。

形勢依然擁海山。源家陳跡夕陽間。英圖何止齊桓業。  
機變或同曹操姦。姦坐弄國鈞真大事。誣誅諸弟本強顏。  
莫嗟身後衰亡速。天道分明是好還。

義肝忠膽無多士。怪雨盲風更幾年。政柄渾歸兒女手。  
老姦兼執舅家權。世間往往狐欺虎。天下滔滔海變田。  
聞道謀臣似王猛。可能正朔諫秦堅。

強梁事豈一朝成。籠絡乾坤勢太橫。土芥寇讐言亦甚。  
是非順逆倩誰明。江山有恨三宮駕。天地無知九代榮。  
試向海濱時悵望。雄風吹起怒濤聲。

心計雖私亦有功。空山何處見遺風。將軍祠宇荒烟裡。  
管領衙門古圃中。恩及蒼生在勤儉。智欺一世定英雄。  
思量此際堪稱快。梟首胡奴杜世忠。

古木回巖氣鬱蒼。巍存猶見梵王宮。戰爭故習人心險。  
衰亂餘風異教隆。容易朝廷為跋扈。慙慙夷鬼費尊崇。

憐他奕世講玄理。墮落魔雲障雨中。  
乾坤回首轉長嘆。神聖靈威赫可觀。酒臭通天天狗出。  
寶刀投海海潮乾。歛然一炬付焦土。好及此時回倒瀾。  
安得賢如房魏輩。細論創業守成難。  
中興功德又何加。捲盡風雲耀日華。九世陪臣執國命。  
一朝戎政復王家。更張有術宜治本。良法無他在禁奢。  
大息千秋失期會。還將要害托姦邪。  
土室陰陰白日昏。虜庭正氣事堪論。秦玉全定唐家業。  
漢帝寧知太子冤。自昔聰明多速禍。于今骨肉有讒言。  
忠魂不祭空千古。踟泣憑誰懇九閻。

來宿鎌倉山下村。鼓鼙聲死海潮喧。箴言敢擬阿房賦。  
往事偏同金谷園。水涸蛟龍移窟宅。草深狐兔長兒孫。  
高吟宋代遺民句。落日荒原獨斷魂。

不須弔古苦咨嗟。今日昇平久戢戈。劉蹶嬴顛幾英傑。  
龍蟠虎踞有山河。去沽村店杏花酒。醉唱春風麥秀歌。  
獨喜天潢流不竭。西方依舊五雲多。

暑夕得雨

梧窗殘滴響蕭蕭。一雨晚來炎忽消。燈火隣樓人笑語。  
始知時節近星宵。

題画竹



我家脩竹在樓前。風雨半宵驚醉眠。一自東遊落城市。此聲不聽已三年。

送大沼子壽遊筑波山

郊原千里曠無山。山在蒼茫烟霧間。佇立笑吾勞遠思。登臨知汝破愁顏。帶將孤劍當僮僕。領取閑雲伴往還。莫道羊腸行路險。也勝百折世途艱。

送竹內九萬遊南總兼示遠山雲如時雲如遊寓  
南總九十九里

風物淒涼氣欲秋。故人適作總南遊。一朝小別聊呼酒。三日行程半在舟。好句有時天外得。浩波無際望中收。

知君囊底抽竒筆。題遍江山處處樓。

曾遊略記南中勝。我且陳言君且聽。烟霧晴來露遙嶺。郊原盡處接滄溟。漁村夕照人垂釣。涼夜濤聲月照汀。若見遠生煩寄語。莫將踪跡學浮萍。

八月十五夜尾藤水竹先生席上同牧默菴門田  
樸齋林鶴橋久保竹外石井潭香賦分韻

瀟灑亭臺迥出塵。東山青缺湧冰輪。一年秋色在今夜。滿座清風多故人。露氣滴衣涼似水。蟾光落地白如銀。賞心樂事能相保。何害聯吟坐達晨。

贈宇野子方

舉世奔馳靡人情薄似雲英才何寂莫虛譽只紛紜且  
學蛟龍蟄寧甘燕雀群獨嘉沈鬱士同友有夫君  
夙抱杜陵志兼能彭澤詩練磨消客氣閑淡寫幽思誰  
極頹風起多為習俗移辛勤君莫情雲路豈無期

秋雨二首以題字為韻

錄一

宵長晝亦長起卧聽風雨幽味在新茶閑梅唯閉戶炎  
涼感歲華豐歉思民苦煉石竟無人天穿誰得補

歲晚得家弟書

最是殘年多旅愁冷烟濕雪滯東州伴吾一劍孤燈耳  
喜汝雙魚千里投往事真成等騎虎閑心到底似浮鷗  
休嗔歲歲歸期誤負病相仍不自由

寓居北隣有梅花數株恰與書窗相對清絕可愛  
一日訪梅癡上人談及此上人即座賦詩見贈落  
句云恰比東隣窺玉女嬌顏只解惱才人因賦二  
律以答其意

豈有新詩答令辰隔牆空對一枝春此花平昔非生面  
何幸今年又作隣飛到吟窗如有意立臨流水自無塵  
碧雲博得高僧偈好了東風未了因

門鎖東風晝不開暗香吹滿小樓臺只看牆角垂垂發  
何更江南處處栽烟雨空庭同寂莫黃昏淡月立徘徊

梅花匹似東家女。只愧人非宋玉才。

送星巖先生携室遊房總諸州三首

廿年南北若為情。又作海天千里行。三寸毫鋒闢詩國。  
一瓢酒力破愁城。無邊白浪漁家景。不盡青山牧笛聲。  
知得風流能變俗。東州自此出才英。

二月東風吹不寒。江花江柳送征鞍。人言艷麗同徐淑。  
我惜飄零似伯鸞。客館挑燈話烟水。夕陽聯句度林巒。  
最思晴夜海樓月。琴酒陶然相對看。

送別今朝不敢留。天涯尋勝太風流。主人東道爭延接。  
到處登臨儘自由。雲斷鏡光灣上寺。潮高鉞子港頭樓。

江山皆我題名地。愧被先生問昔遊。

辛丑春記事

愁雲無際雨淒然。春暮天如秋暮天。不關寒食清明事。  
三日城中又禁烟。

詠柳

舞榭妝樓隨處新。都將嬌態占芳辰。誰知陶令門前樹。  
一段高風別作春。

松靄上人絕句卷題詞四首

數百千言未足奇。語多要少又胡為。圓公著眼高如許。  
渾捲波瀾入小詩。

紫艷紅英一世譁。君家本色獨清華。若將春景比詩品。  
千樹東山初發花。

蘇家唱荅香山社。自古名僧多善詩。不怪超然風趣異。  
絕無塵垢礙吟思。

詩言禪味本相同。妙在天機活潑中。一派正宗君可繼。  
鉢盂當日渭南翁。

惜春詞四首同雲崖上人賦

樓前楊柳綠斜斜。樓後山櫻正落花。春似佳人偏易老。  
尊無美酒奈難賒。何時書劍酬初志。所在江山即是家。  
詞客從來多薄命。鬢絲禪榻了生涯。

蕭齋參得一乘禪。數盡華年意惘然。金鴨香消人在夢。  
紅樓酒散月如烟。飛花芳草王孫墓。落日東風野渡船。  
若許懷襟向誰訴。無情春色有情天。

一瞥韶光似夢醒。滿庭新綠雨冥冥。閑身渾付盃中物。  
遊跡偏同水上萍。燈火深沈凝暗壁。暮烟慘澹鎖孤亭。  
懺除綺語消何物。只此楞嚴四卷經。

簾波不動樹陰陰。客散山園玉磬沈。醉裡歡場絲竹肉。  
指頭妙悟去來今。未知一箇仙緣絕。略解三生佛劫深。  
遊子天涯零落感。併將春恨自難禁。

初夏偶作

綠樹陰中清晝長。除慵解倦是何方。病醒身似劉賓客。  
要乞白家茶一囊。

醉死道人歌贈竹內九萬

世間快事寧有此。醉死道人醉未死。百歲匆匆一夢場。  
利奔名走事何鄙。勸君且醉風月天。勸君且醉王侯前。  
勸君朝朝暮暮醉莫醒。醉中自古足神仙。君言神仙非  
所悅。醉死要踏伯倫轍。達哉此意吾亦欽。與君醉死同  
墓穴。吁嗟乎。人世生死固其常。迷津何處問慈航。歸命  
頂禮米汁佛。不生淨土生醉鄉。

孔明草廬圖

樂毅報國讐管仲。尊王室平生比二公。此心明天日。

讀詩佛老人集

才力是天非易進。只看風調日爭新。後生輕視江山集。  
得似江山能幾人。

義丐篇

巷有一丐兒。正直出天資。曾拾一囊寶。問王遂歸之。其  
兒攘一物。激怒加鞭笞。曰我窮困者。養育未免飢。使爾  
至此極。可憎又可悲。今且枉宥怒。再回投魍魎。攘竊非  
我子。慎哉勿忘遺。吁嗟人性善。丐兒猶如斯。悲夫澆季  
俗。舉世貪且欺。征稅多暴厲。財賄亂是非。充類到義盡。

不盜果是誰。我感丐兒事。作詩代箴規。

讀宋史

晚節黃花句亦工。朝廷朋黨未成風。宋家第一好人物。莫是能詩韓魏公。

送嶺田士德遊松前六首

雋也吾黨一奇士。軀幹雖小腹中寬。浪遊寧知路遠近。爛醉總忘事艱難。治亂千秋歸眼底。水電六月送毫端。堪嗟韜略今無用。枉把琴書學汗漫。

萬峰青了片帆懸。歷盡扶桑有別天。魚眼射波紅似日。仙山在目杳如烟。曾聞先聖乘桴嘆。今擬東坡渡海篇。

想見醉吟激處。危檣落日是松前。

太平恩澤遠無涯。又見繁華起海陬。估客舟船來上國。市街人語雜諸夷。荒原豈是耕桑地。盛夏却如寒沍時。今日煩君問風土。一編遊記百篇詩。

積霧陰霾風物異。天容海色兩蒼茫。未看教化遍千島。猶有蠻民祭九郎。失路客揮懷古淚。吟詩人具濟時方。邊亭孤宿淒涼夜。試誦今吾送別章。

怪風腥雨恨悠悠。海外真知更九州。夜觀星象候天度。

醉剔蚌燈閱地球。士德游囊中常携測量器地球圖等鄂羅沒吉或咫尺。

北界中原是咽喉。邊疆利害談非易。莫慕當年博望侯。

獨行千里果何為。尋遍天涯山水奇。子美文章淪落後。  
馬遷志業壯遊時。勿來關廢空花木。多賀城荒有古碑。  
勸汝歸程休草草。金華松島好題詩。

嗟我貧無書

嗟我貧無書。零碎二三冊。賣餘錢崖詩。蠹殘東坡策。誦  
之排憂愁。對之送朝夕。地下若有知。豈謂非莫逆。昨日  
借一書。鴻文誠意伯。信哉古人言。奇書等趙壁。

將西歸留別都下友人

原二

山人何事戀都城。也向尊前黯淚橫。鳳起龍騰存夙志。  
蘭交松契見真情。春風花底詩千首。秋月樓頭笛一聲。  
空自淹留空自去。慚無功業答昇平。

日光山

三峰對峙勢嵯峨。載筆日光山下過。天地英靈秘巖壑。  
金銀樓閣照烟蘿。頌言敢擬生民什。閑句聊賡擊壤歌。  
霞宿雲遊是誰賜。千秋回首感恩波。

雨中宿大谷伯容家。伯容多藏諸名人。法帖展觀  
終日亦客中之一適也。

風雨山齋苦寂寥。且因文墨慰無聊。魯公健筆精神在。  
米老狂書韻致饒。遺意千秋猶可見。英魂一去不須招。  
此間妙理誰能會。獨與前賢共半宵。

足利學校拜參議小野公遺像

千古興衰不用論。猶欣小校故基存。飄零何面對遺像。

我是相公幾葉孫。吾族出于參議公

宿碧洞道人家座間賦示家在巖匱山中

高齋峭坐覺神清。轉石湍流遠有聲。突兀凌空碧岩聳。  
悠揚繞屋白雲橫。地原天下為三絕。人自閑中了一生。  
休說當年攻守事。山靈不喜看兵爭。

信州松川溫泉雜詩示根岸綠山高井鴻山高津

菁齋三子索和

僻幽如許復何言。且喜比隣笑語喧。野藪山肴能醉客。

茅樓草閣別為村。雪晴林壑新開畫。日落雲烟淡滿門。

淳朴民風今尚在。誰知此地即仙源。

一道煖流通絕壑。浴場連接架巖巖。人如魚鼈群相戲。

水比江潮味更鹹。毛信諸山溫泉大抵有硫磺但覺遍

身香氣染。頓忘空谷雪威嚴。救他癢痼多神驗。竒藥何

須探玉函。

彩霞晴旭滿窗新。兒女歡聲喧四隣。清世誰家不杯酒。

深山此處亦青春。不妨芳信梅花晚。且喜東君德化鈞。

今日寧親期已過。何心留滯送嘉辰。

幽窗浴罷坐看山。客子襟懷且自閑。古硯呵冰時寫句。



小瓶溫酒暫舒顏。寄蹤雪壑寒巖底。養病年頭臘尾間。  
鄉路一千猶未半。思量何日是刀環。

松代城下留別不息盟兄靜山國手彌天上人

東風回首幾嘆嗟。運老年光掣電過。重會何時同笑語。  
故園此去隔關河。十年倦客征裘古。二月春城柳色多。  
醉筆漫題留贈句。高樓落日奈愁何。

歸家

擁門楊柳綠依依。野水東頭石徑微。蘇子敝裘感相似。  
朱家畫錦願空違。老親喜動春生座。隣叟情深夜叩扉。  
今日是真非是夢。東風細雨故鄉歸。

同松堂先生及霞山翠岩二師蓬萊雲屏碧峰諸

兄遊姊川看辛夷花

相逢多是舊心知。笑把花前酒一卮。十歲遠遊如夢耳。  
難波隄上看辛夷。

卧病數日枕上漫題

春風威何厲。春寒不可當。側卧擁重被。慄如抱冰霜。急  
呼芳冽酒。以代發散方。一豎何為者。安得入膏肓。  
除惡要其早。防邪貴其密。悔我調養非。懊惱已累日。人  
身與家國。小大理則一。寄言當路人。慎勿從權術。

山居初夏

九十春光夢一空。春光寄在碧山中。說向都城應不信。  
深溪四月杏花風。

題芙蓉石為蓬萊山人

有石三峯如削成。雲端積雪自分明。憶得前游東海道。

薩埵山上看新晴。

石上有文如浮雲積雪

孕秀含靈勢壯哉。盆中盛得小崔嵬。莫言縮地無仙術。  
能使烟嵐入座來。

風流好事是平生。吾愛山人胸宇清。商略前身應海岳。  
一時傳遍石顛名。

無詩起用放翁句

三日無詩覺吾衰。况今三月更無詩。學原淺薄真堪恥。  
病是踈慵豈得醫。春草池塘夢醒後。灞橋驢背雪晴時。  
追思先哲工夫處。且試閑窗筆一枝。

寄懷菱田世祥

破壁殘燈瘦影寒。一杯誰與話辛酸。孤生空抱遠遊志。  
卒歲偏添離索歎。靜夜兩聲和夢聽。亂山暮色帶雲看。  
濃西江北路非遠。其奈尋常相見難。

癸卯元旦

浪遊幾歲滯東關。歷遍風酸雪苦間。弟妹團圓豈辭醉。  
今年元旦在家山。

今探梅絕句

孤歌傾盡日西斜。要乞山僧一碗茶。遠聽鐘聲迂路去。別村又得見梅花。

春日雜詩三首

幽徑春風長綠苔。柴門雖設不曾開。被他喚嬾未全嬾。起為瓶花換水來。

小鼎香殘烟縷斜。春寒如水洒窗紗。黃昏一陣無情雨。瘦損紅櫻欲綻花。

村南村北雨新晴。入眼峯巒瑞色明。歸卧家山纔匝歲。東風又動遠遊情。

後惜春詞

余曩在江戶作惜春詞四章頗傳誦於同人間。賡和者十數人亦一時之韻事也。今茲屏居家鄉病起無事春方向盡因復作四章題曰後惜春詞。然山中孤寂吾言之而聽者誰歟。吾唱之而和者誰歟。是非無所與同為之愴然。

往事悠悠烟水長。銀箋寫恨餞東皇。月和殘夢茫無跡。春到啼鶻易斷腸。縱使心根如木石。那堪眼底閱滄桑。繁華銷盡風流歇。何處鐘聲又夕陽。

陽春有脚去何之。墜素翻紅各自悲。玩味放翁歎老語。

吟殘白傳遣姬詩。東君於我恩偏淺。西日倩誰留少時。  
一片閒情拋不得。任他花柳笑吾痴。

夢聞蜀魄醒聞鶯。棖觸無端萬感生。幾樹風花吹有影。  
漫空雪絮落無聲。粉愁香恨隔年別。燈炷鐘殘今夕情。  
寂是俊遊難忘處。滿樓烟月玉人箏。

好賦招魂寄水流。塵封高閣慘於秋。花開花謝奈天意。  
春去春來關我愁。孤館殘燈歎倦枕。半簾疎雨夢歸舟。  
玄都道士今何在。惹得劉郎感昔遊。

先考忌辰掃墓而歸愴然書二十字

我年已三十。志業一無成。香花謁墳墓。不知雙淚橫。

論詩

詩人本意在箴規。語要平常不要奇。若就先賢論風格。  
香山樂府是吾師。

湖山樓詩鈔卷之一

湖山樓詩鈔卷之二

淡海 橫山卷 舒公

登嶽三首

鶴駕鸞驂何所羨。短筇支到白雲邊。豪情不覺地球大。  
放眼真知天體圓。絕頂寒風無六月。陰厓積雪自千年。  
腰間我有一瓢酒。欲醉玉皇香案前。

茫茫八極靜塵氛。獨立飄然思不羣。月窟星宮應尺咫。  
十洲三島漫紛云。赤烏夜躍東瀛水。金氣秋流大麓雲。  
高宿峯頭支醉枕。鈞天廣樂夢中聞。  
青蓮一去逸才稀。誰復登高能賦詩。世界三千歸掌握。

鴻程九萬可風。追人間草木未生處。天上神仙來會時。  
為報東西好遊士。不攀大岳莫言奇。

不動山人歌贈生方猛叔

藥研溝畔不動祠。不動靈現靈且奇。虔祈誠禱聲應響。  
眇視跛行世皆知。妖姦投機私壟斷。廣張罪福誘蚩蚩。  
解衣散錢求富貴。遠近競來勢難持。不動山人胡為者。  
風流自開翰墨社。一廛卜居住何邊。不動明王靈祠下。  
性能好酒不好佛。自慕退之與白也。草聖更繼張顛名。  
馳毫驟墨劇奔馬。前賢筆蹟豈易尋。考究遺法涉古今。  
曾悟柳家正心說。正心即是不動心。其技雖小其志大。

要為迷者施金針。名同明王居亦近。未知功德孰寂深。  
近歲新政整風俗。正恐異教多流毒。毀其祠廟遷其居。  
不許巫覡混里曲。吁嗟明王明不明。不動靈蹟動何輕。  
藥研溝畔環堵室。山人獨占不動名。

徂徠先生墓

秋風蕭颯舊墳塋。燈火禪林無限情。豪氣當年空蓋世。  
清時何意好論兵。非朱非陸一家學。維武維文千古名。  
今日人才寥聞甚。轉教後進慕先生。

澤井鶴汀唵香集題詞

絕艷才華絕妙辭。青簾紅燭詠腰肢。婉柔深得風人旨。

綺靡何妨隱者詩。眉影半奩尋舊夢。藕絲千縷繫相思。  
一枝彩筆誰相匹。非是微之即牧之。

儂風慙雨落花天。何處春愁寂黯然。多事垂楊偏嬾娜。  
無情芳草也芊綿。星河雲海還痴願。鳳伯鸞飄了宿緣。  
不惜金釵行十二。為君沽酒落新編。

星巖先生室張氏紅蘭小集題詞

莫欺三寸弓鞋小。踏破江山萬里春。長得琴書陪燕賞。  
寧辭桂玉共酸辛。班昭本志在箴戒。德曜遺風甘隱倫。  
夫子文章重天下。室家何怪有斯人。

誰信詞章是緒餘。吟成長短盡瓊瑤。優柔清婉人相似。

卓識高情世莫如。不廢居常鍼線事。兼攻古昔聖賢書。

咲他弄月嘲花伴。要把浮華買中合譽。

墨水舟中戲贈大澤子世

扁舟明月遡清瀆。人道仙凡自此分。青鳥春傳蓬島信。  
錦屏夜鎖楚臺雪。司勳薄倖誰能比。韓偓香奩獨絕群。  
蕭灑風流才子事。狂名千載不妨聞。

閏九月十三日同大沼子壽賦用東坡定惠院寓

居韻

江天綠色月如霜。此際不飲奈良夜。與君年來同貧苦。  
只期雲龍從上下。詞源滾滾何所極。天上銀河勢倒瀉。

勇奮誰登李杜壇。醅酎同是愁阮。垂閨秋四回看。圓月清遊天賜。非人借。却恐歡樂催哀情。月有盈缺。花開謝。朝來道路說滄素。候門晝閉似僧舍。吾曹慣貧仍耐寒。焉知苦茶非甘蔗。國有讒人家點鼠。世上風波真可怕。作詩一笑記今夕。狂放任他俗士罵。

秋晚書感

風雨三秋盡。山林百草萎。遊子多感慨。况復逢此時。孤負不用說。桂玉柰難支。僧房寄寓客。童蒙章句師。江城名利市。碌碌將何為。殘羹與冷炙。三復杜陵詩。

新寒

簾影低垂不上鉤。斷砧踈雨又深秋。剔燈危坐悄無語。一味新寒入夜愁。

別後寄友人

醉中草草別情輕。別後我翻添別情。昨夜陰風今夜雨。為君千里算歸程。

余曩有送竹內九萬遊南總詩。落句云若見遠生

煩寄語。莫將遊跡學浮萍。爾後契濶杳無消息。頃

訪九萬案頭有總南卜居集者。取而閱之。則遠生

雲如所著也。余喜其不負所期。因賦一律以題其

後



卜居則刻卜居集。好為江山發秀靈。耕釣古來多隱逸。  
琴書今日免飄零。冰霜練骨吟身瘦。風雨驅毫海氣腥。  
喜汝能從平素語。不將遊跡學浮萍。

別後寄懷梅癡上人枕山老兄

分手今纔兩日過。旅程情況定如何。閑雲止水禪家偈。  
店月橋霜客子歌。遠嶺幾層晴看雪。長河一片淨無波。  
寒天却是吟思好。知得唱酬新句多。

枕山老兄歸自結城席上賦贈重次前韻

夢裡光陰忽忽過。君來君去奈愁何。且觀圓澤三生證。  
敢賦梁鴻五噫歌。詩酒生涯宜淡薄。英雄本色是烟波。

江山到處勝因在。莫說 來 失意多。

枕山在都數日。又有相南之行詩以記別。三次前

韻

晚色蕭條一雁過。情深無奈別離何。縱橫未達男兒志。  
慷慨重賡壯士歌。咫尺郵程嗟落托。尋常平地見風波。  
此心不用向人說。世上相知豈是多。

梅癡上人席上同枕山兄賦四次前韻時上人自

結城入都枕山歸自南遊

別去三旬轉瞬過。一宵相會喜如何。燈前細雨供吟話。  
世上浮名付醉歌。寒高積雪千山曉。日落長風大海波。

南轅北轍同時至。借問客愁誰最多。

十二月某日大沼竹溪翁十七年忌辰次梅癡上

人隨齋文學唱和詩韻以贈枕山老兄

原四

思君不見誦君詩。每恨吾生十歲遲。昨夜音容恍相對。  
屋梁落月夢醒時。

彩筆翩翩誰比才。欽君詩派一宗開。韓家奕世聲名遠。  
老鳳歸飛雖鳳來。

歲晏百憂集三首

歲晏百憂集。黯然雙淚橫。窮通皆有命。天地本無情。暮  
雨蕭蕭響。寒禽啞啞鳴。立春今日是。何處瑞光生。

歲晏百憂集。何由披此懷。夜風寒短褐。燈火寂空齋。迂  
腐人應笑。粗豪世所排。古來英傑士。往往與時乖。

歲晏百憂集。長歌酒一尊。親交非易遇。薄俗豈堪論。小  
寓投僧舍。微才愧聖門。悲傷亦何益。爛醉送朝昏。

寄題森田簡夫梅磻書屋

海南地暖似江南。見說衡茅鎖翠嵐。梅是親栽喜花早。  
酒唯家釀愛泉甘。一溪烟月歸吟咏。滿院春風入笑談。  
他日我能西討去。肯容門外繫征驂。

新春雜詩

無官無錄一身輕。高卧迎春夢不驚。又是閑中別天地。

半窗紅日木魚聲。余時寓綠山僧舍

孤亭春色寂無譁。堅坐思詩到日斜。誰為先生作新歲。

座中上客是梅花。

滿目烟塵易愴神。城東十里慘無春。冠裳南北拜年鬧。

誰問焦頭爛額人。臘月廿八日城東火起延燒數千家

### 小豫山歌

房州山水冠東關。我曾浪遊三往還。鏡浦風烟接野島。

鋸山東去是豫山。掬靄山人風流客。家與豫山隔咫尺。

性僻愛山如愛子。愛之不足又愛石。昨夜訪我來載酒。

自誇東海袖中有。坡公袖中有我携此老僮捧出小玲瓏

驚見三峰峙座右。其大尺餘其勢豪。紫嶂翠巒疊波濤。

中有一峰竄峭絕。宛如豫山萬丈高。鬼削神剡何太恠。

對之呼竒且稱快。襄陽米芾死千年。九原有知應再拜。

噫我萍踪寄都城。日夜風塵攪幽情。鋸山鏡水幾回首。

曾遊千里暮雲橫。今對此石留君醉。恍疑房南我重至。

袖中東海言果信。不羨仙人能縮地。

### 東叡山賞花

香臺高聳小湖濱。映日紅雲簇簇新。春色嗾人風火急。

長街一陣漲遊塵。

二月山中錦一堆。淺紅淡白壓枝開。地宜幽邃花宜婉。

愛此松杉點綴來。

賀磐溪大槻文學災後新居

炎焰銷來僅月餘。喜君開宴落新居。辛勤何待卅年業。  
韓子今朝重有廬。

醉中讀史戲作

醉味陶然思不群。危樓百尺倚斜曛。笑拋人世無窮事。  
試誦平生快意文。一炬周郎燒萬艦。單身翼德退三軍。  
踈慵無復功名念。只要閑中茗椀勳。

送鈴木彥之歸房州

瞥過三旬如一夢。何堪今日對離筵。校文風雨芝山夕。  
載酒鶯花墨水船。狂放接人原不害。弟兄視我亦前緣。  
重游期近君休誤。綠樹蟬聲五月天。

甲辰初夏將遊常總之間留別枕山兄

來去無時同笑歡。別雖三日也堪歎。踈才何恨成名晚。  
瑣事翻知處世難。入眼江山春已盡。關心風雨夏猶寒。  
又於客裡重為客。看我愁思非一端。

利根河上作

菜畦麥隴盡泥沙。漂沒江村數百家。誰信城中人意別。  
醉聽風雨惜春華。

同棚谷元卿赤松子忠諸子遊阿彌陀院座中有

携茶山集者因疊用集中遊福盛寺詩韻

原三

一徑探幽晚出城。夏初景物艷於春。同行有約多相背。始覺閑人無幾人。

此日森田櫻園加藤穆軒諸子期同遊不至

宿泉田古庵家酒後頗覺適意因賦長句四韻題

座右壁

短翼從來不及群。零丁今日復何云。茶村焙火猶初夏。茅舍炊烟又夕勳。山影近侵簾影入。水聲遠帶竹聲聞。客中快適無過此。起倚闌干獨看雲。

宿結城弘經寺同梅花孤峯竹汀松嶺諸師賦分韻得刪

纖埃不到寂松關。起卧筆床茶檯間。誰道萍踪本無定。纔過僧院則能閑。香芭嫩籜玉生地。絕艷竒芳紅滿山。多謝老僧優待客。留歡三日未言還。

橡木寓居雜題

後堂響木鯨。前園喧蛙鼓。寄栖日蕭條。况此經旬雨。所親唯枕衾。相逢多農圃。安得同調友。一醉話今古。積陰降淫雨。冷氣透疎簾。雖曰黃梅節。恐非豐穰占。杞憂不能止。歎慨立北檐。檐頭水田近。又看漲痕添。一日復一日。稍稍得新知。朝昏頻經過。談諧慰孤羈。尊酒或問字。燈檠時論詩。我何有寸長。諸子謬見推。

檜陰落窗紗。荷氣歸醉枕。節物俄轉移。倦客思鄉甚久。  
欽顏氏子。陋巷樂歌飲。不論姓朱人。榮歸炫畫錦。  
喧靜中間地。市廛接僧寺。遠聲聞絲竹。遙嶺望紫翠。吾  
生又何為。長晝淡無事。昨來暑氣多。獨向北窗睡。  
平生愛山水。况為浪遊身。未得探一勝。壹鬱過三旬。事  
閑體易嬾。興漫句難新。明日城中去。何以誇故人。

六月二十三日拉島井上永山三子遊太平山往

返得五絕句錄二

雨苦深泥晴苦熱。愁吟悶坐是朝昏。淡陰今日覺涼起。  
催得遊人初出門。

聖世何山不太平。此山特表太平名。天風吹度萬松樹。  
髣髴笙鏞合奏聲。

八月十五夜同大沼子壽墨水賞月三首

處世無拘束。起居得自由。平生懶為性。高卧謝應酬。誰  
知風月夜。時時能出遊。一瓢在腰下。百錢掛杖頭。莫笑  
貧且素。貧素便風流。古人有佳語。賤價買清秋。

有月一年最有友。一時英勝區大都。冠美酒天下名。此  
遊何快也。四難能相并。酌酒憑欄角。醉吹紫鸞笙。小舟  
時來往。伊軋中流聲。天公知何意。迎我任仙瀛。

賞月墨江濱。去年又今歲。臨此江流清。看此江天霽。胸

中為一洗。何地著芥蒂。往事不必論。後遊猶可繼。游戲本神通。風月豈塵世。醉歸下高閣。天風飄衣袂。

送竹內鵬九萬遊北越

無才無德我何言。送別江樓酒一尊。脫屣不須向人說。江湖醉死亦君恩。

俊遊豪飲有誰同。到手青錢轉手空。意氣騰翻北溟水。鵬乎知汝賽鵬翁。

甲辰九月將遊松島詩以記事

有客明朝奧州去。送別置酒坐中宵。酒間談盡松島勝。千里東海道程遙。吾性從來山水癖。每恨南北經行窄。

客言東道我為主。何不早早理鞋策。人生百事貴勇快。今聽此言敢相背。興來万里同尋尺。眼高天地無外內。遊情纔動支得難。寧問深秋霜露寒。立談先決連鑣計。痛飲且盡今夜歡。遠寺鐘響起栖鳥。短劍在身征裝了。踟躕醉脚初登途。出門一笑天欲曉。

宿二本松城下寄懷良齋安積先生在江戶

都門曾任咫尺地。只道咫尺相見易。一朝君去天涯遙。相見無期空夢寐。今日東游豈偶然。游意第一在訪君。人傳昨夜君西上。嚴程已入都門雲。會面參差巧相失。其奈人事無可必。客亭題詩寄相思。西歸及君滯都日。

題松島金扇亭

西風幾日此淹留。客枕寒生松島秋。且喜壯遊酬夙志。  
不論竒勝在荒陬。潮通靺鞨三千里。雲接蓬萊七十州。  
讓與南山快心句。枯腸何用費冥搜。

金華山

天風一幕雨新收。萬里東洋掌上秋。帝把精英築孤島。  
人言標柱鎮蜻州。才非太白應難賦。貪若秦皇豈許遊。  
今日登臨吾始信。金華山是古瀛洲。

訪養賢堂教授大槻君席上賦贈

巋然棟宇古林中。結構真知大國風。講武場高橫樹杪。  
讀書聲聒滿堂東。饑荒已過民情穩。山野遙開地勢雄。  
庠序從來政治本。期君教育有成功。

中澤老人席上分賦宋朝名臣得寇萊公

歌呼飲博亦英雄。我愛澶淵一戰功。虛禮空文當代俗。  
此公獨有古人風。

元旦墨水探梅同大沼子壽

唵筇來熟野翁家。沿竹穿松小徑斜。不做尋常拜年客。  
開春第一問梅花。

寄題坂野大來耕雨亭

漠漠郊原一望平。數家村落午鷄聲。不因黽勉冒風雨。



安得沮如歸耦耕。清世立名非汗馬。墾田有効勝攻城。  
百年占斷安栖地。坐看春園草木榮。東郊雨暖柳條青。  
二月春風戴勝鳴。短笠圓蓑驅犢去。菜畦麥隴荷鋤行。  
力耕寧墜祖先業。講習深尋周孔情。遺躅君能相繼否。  
帶經千古有芳名。

高津瀾卿山田溫泉四時雜詠題詞

溫泉地近好優遊。雪後晴烟明月秋。因病得閑應韻事。  
耽吟避世定高流。何時洞口尋仙客。今日山中起酒樓。  
且把新詩記風俗。前身君是竹枝劉。

春晚寫懷

湘簾影靜燕差池。一味輕寒不自支。烟外殘鐘飄雨片。  
柳陰新水浸風絲。驅除二豎知何日。斷送三春又此時。  
記得前宵行樂夢。落花芳草白鬚祠。

次西島大車春晚書懷韻

慷慨猶餘醉後吟。龍鍾非復向來心。浮花浪蕊俄衰盛。  
落日西山自古今。客到春殘愁益切。酒於貧裡味尤深。  
靜窗獨閱陶家集。千古高蹤聊可尋。

迎梅絕句同南園上人賦

層層綠樹暗如烟。一叫新鶻驚午眠。怪底牀頭書葉濕。  
連陰又到熟梅天。

寄題堽堂千村君峒山五勝

半天巢

人情手翻覆。世路日崢嶸。半天危巢上。此心獨太平。

赤松坂

吾友張子房。吾師赤松子。千載期重逢。分明此境是。

醒心泉

醒心有美名。甘泉比靈液。一掬把餘清。分與塵熱客。

仙奕林

興味輸羸外。消閑棋一枰。颯颯松風起。和他落子聲。

嘯雲巖

白雲擁古巖。山氣夜清爽。四顧不見人。一聲長嘯響。

讀弘庵藤森先輩航湖紀勝題其後

盤空硬語絕浮纖。湖海風雲歸筆尖。憶我孤吟三宿處。

余曩遊鉤子港有句云紛囂豈羨君一舉二難兼紀中是優遊地且為溪山三日留 難併四美 具之語 豪遊應繼謝靈運。壯思恰同蘇子瞻。手把奚

囊聊點檢。何唯西子對無塩。

題涼山石水軒次大奎上人韻

幾重寶樹擁珠樓。列有小軒泉石幽。豈啻曹溪能卜地。也同智永嗣良裘。斬新日月歸真樂。無著身心話舊遊。寄寓若容方外客。焚香拂地學蘇州。

送星巖梁先生歸美濃

偶然揮筆詠歸去。元亮原無官。可辭絕世風華誰不羨。  
滿腔慷慨少人知。迂踈何任傳。衣鉢羈旅尤嫌說。別離。  
我是韓門詩弟子。幾時絳帳得重披。

梅癡上人席上分賦九秋詩余得秋風秋雨

別館蕭條不自支。坐來又起楚人悲。半窗雨氣燈烟亂。  
五夜寒聲木葉知。舊扇正逢捐棄日。敝裘豈是浪遊時。  
杜陵茅屋荒涼甚。憑仗秋天莫漫吹。

誰送秋心寄草堂。亂雲繞屋晚淒涼。蒹葭聲冷難成睡。  
蟀蟋堂寒又斷腸。翦笠莎簑孤素願。西風木葉滯他鄉。

吟殘零落彭城句。一点青燈度夜長。

乙巳中秋同大沼子壽遊墨水是日陰雲四塞

朝米匆忙我何意。頻頻下階候天氣。此日中秋陰雲昏。  
只恐風雨敗幽事。我與友人期同行。要尋墨水去年盟。  
痴情僥倖希萬一。或於雨後得月明。笑君狂癡亦同我。  
輕裝趁約東橋下。水風慘澹難買舟。聯吟十里步亦可。  
籬門一帶野翁家。三三徑成盡種花。萼香冶態何窮極。  
碧紫黃紅鬪鮮華。滿地秋色有如此。始喜我遊非徒爾。  
自古熊魚戒兼收。敢望二難併四美。我期秋月得秋芳。  
其間得失蓋相當。花前題詩聊一笑。有月無月又何妨。

歸路飲水西酒樓醉中走筆再次前韻

盤中無魚非快意。尊中有酒發豪氣。男兒處世為閑人。  
除却風月豈有事。勝遊作例已三歲。敢因陰雨背舊盟。  
近水樓高高百尺。紅燈照水代月明。何啻狂醉齊物我。  
又能放懷小天下。無月無花夜冥濛。却覺這裡風景可。  
君不見世間紛紛富貴家。浮榮一般等風花。回天轉日  
私恩寵。綺食雕盤競豪華。一朝失脚智盡此。覆雨翻雲  
我笑爾。嗚呼近時爭奪漸成風。何似昔日揖讓美。孰為  
遺臭孰流芳。議論愛憎非至當。有酒有魚只須醉。吾儕  
閑遊誰敢妨。

重次不動山人詩韻賀生方猛叔移居

莫笑不動遷其祠。不動之動未足奇。動中有靜靜中動。  
妙理活潑君須知。天動地動說何極。異聞只漫驚虫虫。  
動之所惡在妄動。維精維一要操持。我是平生好事者。  
時參不動山人社。曾作長歌嘲古佛。奇事傳誦遍都下。  
近日山人遷移居。人道不動何動也。我為一言折其疑。  
有似辨士辨白馬。今日新亭來相尋。酒間興激論古今。  
歌呼笑謔繩檢外。風流滿座愜我心。世間富貴又何取。  
笑中有刀毡中針。炊金饌玉美則美。豈如吾曹歡樂深。  
有酒不飲真是俗。飲之無節等鴆毒。醉言及此誰喜聽。

不如狂歌賡一曲。嗚呼尊如日月時晦明。大如山岳或重輕。但使此心精。且一移居何害。不動名。

奉和祭酒林公桂花絕句芳韻

原五

雨後秋天晚色涼。一枝香艷弄幽芳。剡中紅桂永嘉紫。敢羨平泉李氏莊。

歲月堂堂去不回。又看秋苑桂花開。家山兩樹扶疎甚。憶我童年移種來。

誰把清標筆下收。師門俊傑足賡酬。青雲驥尾非吾事。且賞金風一樹秋。

麴坊新居戲題座右壁

拋擲浮名自晏如。市塵踈處寄琴書。吾生真箇拙虺似。漫把僑居為卜居。

橫山舒公抱詩藁一冊就予而謀予時為二豎所役不親筆硯者累月輸詩藁者一切委之簾底但舒公方今一作家而不以予老耄來辱下問何可以他人例視之因力病閱之其作篇篇皆妙靈秀拔令讀者不覺病苦之在身乃加圈批于會心處而返之如其字句小疵瑕則舒公巨眼自能辨之

不待予老耄之言耳

己酉六月初五日 五山池桐孫批時年八十一

湖山詩鈔卷之二 五山池桐孫批時年八十一

湖山詩鈔卷之二

嘉平刻